

乾
象
通
鑑

乾象通鑑卷第七

河間府免解進士臣李季奉

聖旨編

陰微後論

月蝕

月犯歲星

月犯熒惑

月犯鎮星

月犯太白

月犯辰星

彗星犯月

流星犯月

月犯列星

月蝕

尚書緯曰當赦而不赦月爲之蝕

董仲舒對災異曰臣行刑執法不得其中怨氣盛濫及良善則月蝕

京房對災異曰月蝕者人君行適過時專受所制不救則水患壞城

河圖帝覽嬉曰月蝕所宿國貴人死又曰其鄉有大戰拔城

易同卦驗曰月蝕則糴貴又曰月蝕則政之臣下也詩緯推度災異曰月蝕則大臣刑

荊州占曰月蝕則失刑亡國當之

河圖帝覽嬉曰兵常在內而月蝕者其國受殃兵未起而月蝕者所當之國兵戰不勝月滿而蝕者兩軍相當必戰若無軍兵必出將死於野

夏氏占曰月蝕出軍軍折傷後有失月蝕東方其月中有惡風月蝕西方主人爲客

河圖帝覽嬉曰月蝕從上始謂之失道國君當之月蝕從旁始謂之失令相當之月蝕從下始謂之失法將軍當之又曰從上始謂之君親從下始謂之赤子蝕其陰爲女蝕其陽爲男月蝕盡女主當之荊州占曰月蝕盡有太戰破軍將死拔邑亡地月蝕

不盡軍破將不死又曰月蝕青色人民多死五穀
傷糴貴月蝕赤色君爲客不出一年月蝕黃色有
立諸侯國者月蝕白色其國失地或有喪其蝕盡
者糴各以其下宿國占之又曰月已蝕而青者爲
憂月已蝕而赤者爲兵月已蝕而黃者爲財月已
蝕而白者爲喪月已蝕而黑者爲水

河圖帝覽嬉曰月春蝕東方夏蝕南方秋蝕西方冬
蝕北方皆爲其下軍憂又曰春蝕歲惡夏蝕旱秋
蝕兵冬蝕有女喪

荊州占曰孟春蝕賤人當之仲春蝕貴人當之季春蝕

人主當之又曰夏蝕南方歲饑秋蝕西方兵起

河圖帝覽嬉曰有軍在外而月蝕盡者軍罷若未望而蝕者從上始而盡無光天子坐之

荊州占曰月暈歲星而蝕者天下大戰月暈太白而蝕者其國彊兵若戰大將有二心

巫咸曰月犯填星而蝕者其國有土功事

河圖帝覽嬉曰月犯熒惑而蝕者其下破軍亡地大將憂蝕盡者人主位者也蝕不盡者大臣位也近期一年遠期三年

武密占曰月蝕起南方男子惡之起北方女子惡之

東方少者惡之西方老者惡之又曰有軍在外月
蝕自下而上者將軍當之自上而下者人君當之
從四面者兵攻之又曰蝕月盡亡君之殃蝕不盡
散臣之憂月蝕中分不出五年國有兵亡又曰月
蝕而闔有軍必戰無軍兵起一曰隨所蝕戰利又
曰兩月並蝕天下亂月蝕有氣從外來入月中主
憂氣北行北軍憂東西亦然氣所向者敗月蝕後
三日有雨事解月蝕有彗星入月者其下有兵喪
又曰月蝕旣女主當之亦曰有文喪又曰夷狄兵
起入寇中國

陳卓叙占曰月蝕盡者女主惡之月蝕不盡者人臣有憂

夏氏占曰月蝕有白暈貫之則人主有憂亦曰王者惡之月蝕有白虹貫之則天下有兵喪

晉懷帝永嘉五年三月壬申夜月蝕盡大人憂又曰其國貴人死其後劉曜王彌犯闕帝後沒於寇庭

晉義熙元年至十四年月蝕者四皆從上始占曰革代更王臣失君之象其後劉裕受宋王帝遜位于宋

唐睿宗先天元年八月十四日夜月蝕有星入月中至次年七月三日左僕射竇懷正侍郎岑羲中書

令蕭至忠崔湜羽林大將軍元楷李慈等與太平公主同謀期以其月四日以羽林兵作亂上密知之因以中旨告岐王範薛王業兵部尚書郭元振殿中少監姜皎將軍王毛仲吏部尚書崔日用等定計并內侍高力士率兵入虔化門梟元楷李慈於北闕擒賈膺福李猷於內客省執蕭至忠岑羲於朝堂皆斬之以平內難

唐元宗開元十二年七月壬申月蝕既占曰月蝕盡憂在后已卯廢皇后王氏爲庶人后弟太子少保王守一貶爲澤州別駕尋賜死

月犯歲星

河圖帝覽嬉曰月犯歲星其宿國饑

晉書曰月犯歲星主其宿國民流歲饑又占曰有違

兵又曰月蝕歲星其野有逐相

月蝕星者爲月中不見星也

星蝕

月

謂月中見星也

其宿國女主憂臣下叛逆之象月與歲

星同光歲饑月與歲星同宿年多疫疾月與歲星

同宿而蝕粟貴農憂

天文總論曰月蝕歲星主殺戮將相王侯之象或其

分有兵喪歲星蝕月其下有大喪女主憂月凌歲

星年多盜刑獄繁月與歲星同光臣下強盛之象

同光者星月相
近皆明盛也

月貫歲星人流亡歿凶月蝕歲星而

暈歲饑女主憂

李淳風曰月與星同宿年多疾病月乘歲星相殺其
下當有按城

晉惠帝大安二年十一月庚辰歲星入月占曰國有
逐相至永興元年七月左衛將軍陳耽率衆奉帝
伐成都王六軍敗績于蕩陰流矢及乘輿百官分
散侍中嵇紹死之帝傷頰中三矢亡六璽後二年
十一月帝崩

晉元帝太興四年十二月丁亥月犯歲星在房占曰

其國兵饑人流亡永昌元年三月王敦作亂率江
荆之衆來攻敗京師殺將相又鎮北將軍劉隗出
奔百姓並去南畝困於兵革四月又殺湘州刺史
譙王司馬承鎮南將軍甘卓

晉成帝咸康五年四月辛未朔月犯歲星在胃占曰
國饑人流亡乙未月犯歲星在卯及冬有沔南邪
城之敗百姓流亡萬餘家

晉穆帝永和八年十二月月在東井犯歲星占曰秦
饑人流亡是時兵革連起

晉穆帝升平元年十一月壬午月掩歲星在房二年

閏三月乙亥月犯歲星在房占曰人饑一曰豫州有災三年豫州刺史謝萬敗

晉哀帝興寧三年正月乙卯月奄歲星在參占曰參益州之分六月鎮西將軍益州刺史周撫卒十月梁州刺史司馬勲入益州以叛朱序率衆刺史周楚討平之

晉孝武帝太元十九年四月己巳月奄歲星在尾占曰爲饑燕國亡二十年慕容垂遣息寶伐魏反爲所破死者數萬人二十一年垂死國遂衰亡

晉安帝隆安元年六月乙酉月奄歲星在東壁占曰

爲饑衛地有兵二年六月却恢遣鄧啓方等以萬人伐慕容寶於滑臺啓方敗

晉隆安四年十月乙未月奄歲星在北河占曰爲饑胡有兵至元興元年孫恩寇臨海人衆餓死散亡殆盡

晉元興三年二月甲辰月奄歲星於左角占曰天下兵起是年三月丙辰劉裕起義兵殺桓振卒滅諸桓
晉義熙七年六月庚子月犯歲星在畢占曰有邊兵
且饑八月乙未月犯歲星在參占曰益州兵饑七月朱齡石剋蜀

月犯熒惑

巫咸曰熒惑與月同光以其月月蝕有叛臣民饑

河圖帝覽嬉曰熒惑入月中憂在宮中非賊乃盜亦

曰有亂臣相死

黃帝占曰熒惑入月中有兵喪

荊州占曰熒惑入月中臣叛其主

海中占曰熒惑入月中以戰不勝又曰熒惑逆行入

月中及近月七寸之內人主惡之一曰主諂臣用事

京房易傳曰月與熒惑會其宿王死

海中占曰月與熒惑合其宿國貴人傷不可有爲主

內兵

荊州占曰月與熒惑合光芒相及其宿國亂兵起又曰太子憂

巫咸曰月犯熒惑以戰小吏死

河圖帝覽嬉曰月犯熒惑主其國貴人出有兵

荊州占曰月犯熒惑戰勝之兵大將死又曰月嚙熒惑其師破敗

天官書曰月蝕熒惑其國地亂

海中占曰熒惑觸月上角爲相下角爲將中央爲主皆有憂色

天文總論曰月蝕熒惑在北禾稼熟在熒惑南果不成在熒惑東天下默默在熒惑西其分饑兵亂大戰若熒惑蝕月諛臣在側後宮有憂月與熒惑相犯貴人死熒惑逆行入月及近月七寸之內人主惡之

陳卓叙占曰月奄熒惑星見月中則宮中有火災亦曰後宮有驚憂

一行游儀後論曰月乘凌熒惑則人臣有戰死者

古今星釋曰月弦而與熒惑相犯則其國受兵殃月滿而奄熒惑星不見則天子親戎服亦曰主者自

將兵

大象旁通曰月蝕既與熒惑相犯者則人君失政若
革命月蝕不盡而與熒惑相犯者其野有霸者興
漢獻帝延康元年九月十日黃昏時月蝕熒惑出熒
室占曰月有大臣侯王之象熒惑火星漢氏之行
此漢家以兵亡之異也後四年魏文帝受禪

魏明帝景初元年十月丁未月犯熒惑占曰貴人死
二年四月司徒韓暨薨

晉元帝太興二年十一月辛巳月犯熒惑占曰有亂
臣至永昌元年王敦作亂

晉海西公太和元年二月丙子月奄熒惑在參占曰
爲內亂帝不終之徵一曰參魏地五年慕容暉爲
符璽所滅

晉孝武太元十二年二月戊寅熒惑入月占曰有亂
臣若有相戮者是時瑯琊王輔政王妃從兄王國
寶以親昵受寵又陳郡人袁悅苟進交結主相有
隙乳階興矣

晉安帝元興二年十一月辛巳月犯熒惑占曰有亂
臣其年十二月相立篡位於遷帝后於尋陽以永
安何皇后爲零陵君三年二月劉裕盡誅桓氏

宋武帝永初元年十二月庚子月犯熒惑於亢占曰
爲內亂一曰貴人憂七月索賊攻畧青司兗三州
於是禁兵大出後司徒徐羨之尚書令傅亮領軍
謝晦等廢少帝內亂

唐文宗開成四年七月乙未月犯熒惑占曰國有喪
至八月辛亥鄜王薨

月犯鎮星

黃帝曰鎮星入月有土功事或貴人無嗣

荊州占曰月與鎮星合其下國饑又曰其國人貴兵
死先舉事者敗

車馬圖卷之十一
天官書曰月犯鎮星其宿地下犯上

班固天文志曰月蝕鎮星民流千里

天文總論曰月犯鎮星女主有憂或後宮有出又曰
有流民

高宗曰月暈鎮星所在之國兵起不勝

海中占曰月暈鎮星相死不則亡地

荊州占曰月暈鎮星星不明主勝星明客勝

天文別錄曰月奄鎮星月中見星則其國有大兵喪

奄鎮星不見則其國有土功事

陳卓叙占曰月蝕鎮星則其國有憂月犯鎮星與之

同光宗廟有憂國將棄祀

一行游儀後論曰月與鎮星並明芒角觸月其野失
政若更政令芒角相近月赤出角抵觸其國政立
侯王亦曰社稷傾覆

魏明帝太和五年十二月甲辰月犯鎮星占曰爲兵
至六年十月殄夷將軍田豫率衆討吳將周賀於
成山殺賀

魏青龍二年十月乙丑月犯鎮星

晉穆帝永和十年十一月月奄鎮星在輿鬼占曰秦
有兵時相溫伐苻健健堅壁長安溫退十二年八

月相溫劭刻集

晉升平五年三月丁未月犯鎮星在軫占曰爲大喪
五月穆帝崩

晉安帝隆安四年正月乙亥月犯鎮星在牽牛占曰
吳越有兵喪主女憂六月乙未月又犯鎮星在牽
牛其五月孫恩破會稽殺內史謝琰後又破高雅
之於是姚死者十七八七月太和太后李氏崩

晉義熙元年四月己卯月犯鎮星在東壁占曰其地
亡國一曰貴人死七月己未月奄鎮星在東壁占
曰其國以伐亡一日人流十月丁巳月奄鎮星在

營室占同至十一月荊州刺史魏詠之卒二年二月司馬國璠攻沒弋陽後司徒王謐太保武陵王遵左僕射孔安國皆薨

晉義熙十四年四月壬申月犯鎮星於張占曰天下有大喪其明年帝崩

月犯太白

天文錄曰太白與月同光其月月蝕其下兵亡

河圖帝覽嬉曰月與太白相遇者月出其南陽國受兵月出其北陰國受兵

海中占曰太白出月右陰國有謀太白出月左陽國

有謀太白出月下光芒相耀君死民流

荊州占曰月戴太白有卒至兵期五日

河圖帝覽嬉曰太白入月中將軍死一曰臣謀主不成又曰必有內惡戰不勝

郝萌曰太白入月中國失政大人爲亂

京房易傳曰月與太白會宿太子死

河圖帝覽嬉曰月弦太白入月中侯王死又曰月犯太白彊臣作亂國戰不勝又曰太白貫月期不出六年國有大兵戰敗亡地

天官書曰月犯太白彊國戰敗

海中占曰太白居月中無光名月蝕太白彊國君死
太白有光太白蝕月臣叛其主不出三年

巫咸曰月未盡三日候太白出東方在月北中國不
勝負海國勝入月三日候太白出西方在月南中
國勝負海國不勝

荊州占曰入月三日太白失行而南月在北秦兵戰
不勝又曰秋冬入月三日太白出西方居月北者
彊居月南者弱又曰入月三日刺太白大邑拔小
邑驅掠出南方爲陽北方爲陰

天文總論曰月未盡三日候太白出東方與月相並

開月舉指準之其間容一指入月三日有破軍死
將主人不勝容二指入月九日軍大敗主人亡地
容三指入月十五日有破軍主人亡地容四指入
月二十日客軍大敗容五指入月二十七日軍有
陣不戰又曰入月三日候太白出西方與月相並
其間容一指軍在外期十日有破軍死將客勝容
二指期十五日有破軍主敗容三指期二十日有
破軍殺將客勝容四指期二十五日客軍入境客
敗容五指期三十日有陣不戰並出則占不並不占
荊州占曰太白與月並光明軍大戰相去五寸有援

城二寸有軍憂

郗萌曰相去二寸天子罷相五寸天下憂兵五尺天下無害又曰月暈太白與月各其分主憂

荊州占曰月暈太白星入暈中者星色不明則客敗星色明而有角客勝

河圖帝覽嬉曰月暈太白其野受兵戰不勝又曰所守之國兵起

魏明帝青龍二年十月戊寅月狎太白占曰人君死又爲兵至景初元年七月公孫懿叛二年正月遣宣帝討之三年正月天子崩

晉惠帝太安三年正月己卯月犯太白占曰天下有兵至永興元年七月左衛將軍陳眺率衆奉帝伐成都王六軍敗績

晉成帝咸康四年四月己巳七月乙巳月奄太白占曰人君死又爲兵明年石季龍之衆大寇河南於是內外戒嚴六年四月甲午月犯太白占曰人主惡之至八年帝崩

晉穆帝升平三年三月乙酉月犯太白在昴占曰人君死一曰趙地有兵胡不安四年正月慕容儁卒晉升平五年正月乙丑辰時月在危宿奄太白占曰

天下靡散七月慕容恪攻冀州刺史呂護於野王
拔之護奔走時相溫以大衆次宛間護敗乃退

晉哀帝興寧元年十月丙戌月奄太白在須女占曰
天下靡散一曰災在揚州二年洛陽沒其後相溫
傾揚州資實北討敗績死亡大半及真袁真往南
殘破後慕容暉及苻堅互來侵境

晉安帝隆安元年六月庚午月奄太白在太微端門
外占曰國受兵時會稽王道子及元顯專政王詢
王恭殷仲堪楊廣反

晉義熙二年十二月丙午月奄太白在危占曰齊國

亡一曰彊國君死五年四月劉裕大軍北討慕容超卒滅之

月犯辰星

巫咸曰辰星與月同光其月月蝕

海中占曰月與辰星相遇所合宿雨水敗

河圖帝覽嬉曰辰星入月中臣叛主又曰月與辰星合宿其國亡地又曰月犯辰星兵起上卿死或廷尉憂又曰月蝕辰星其國有女主憂又曰兵未起而蝕所當之國戰不勝

荊州占曰辰星入月有水利事辰星入月復出其國

主死入不出其國君臣皆憂又曰月與水合所宿國兵起又曰辰星貫月其國以女子爲亂

京房易傳曰月犯辰星天下有水

海中占曰月暈辰星在春大旱在夏主死在秋大水
在冬大喪

河圖帝覽嬉曰月暈辰星所宿之國大水又曰春夏
民有寒熱疾秋兵起冬其下主憂

漢本始四年七月甲辰辰星在翼軫月犯之占曰兵
起上卿死將相亡至地節二年故大將軍霍光夫
人顯將軍霍禹范明友奉車霍山及諸昆弟賓婚

爲侍中諸曹九卿郡守皆反咸伏其辜

彗星犯月

海中占曰彗星入月中主兵大起一曰期十二年大
饑又曰若彗星入月無光不出其年有亡國星出
亡國復立

荊州占曰彗星觸月臣叛主若彗星貫月有臣謀主
彗星在月上有大兵起將死又曰四夷來侵

河圖帝覽嬉曰彗星在月中兵大起

雌雄圖曰彗星觸月臣不忠

陳卓叙占曰彗星掃月無光天下大變亦曰內亂臣

乾象通鑑卷第八

河間府免解進士臣李季奉

聖旨編

石申周天星座去極度数論

石申列舍二十八座共一百六十六星赤

石申中官星五十四座共三百一十八星赤

石申外官星三十八座共二百七十一星赤

石申列舍二十八星

東方七宿共七十五度

角宿

角二星十二度距南星去極九十七度在赤道外六度

亢宿

亢四星九度距南第二星去極九十五度在赤道外四度

氏宿

氏四星一十五度距西南星去極一百四度在赤道外一十三度

房宿

房四星五度距南第二星去極一百一十五度在赤道外二十四度

心宿

心三星五度距西第一星去極一百一十四度在赤道外二十三度

尾宿

尾九星一十八度距西第二星去極一百二十八度在赤道外三十七度

箕宿

箕四星一十一度距西北第一星去極一百二十三度在赤道外三十二度

北方七宿共九十八度

斗宿

斗六星二十度距魁第四星去極一百二十二度在赤道外三十一度

牽牛

牽牛六星八度距中央大星去極一百一十度半在赤道外一十九度半

須女

須女四星一十二度距西南星去極一百五度在赤道外一十四度

虛宿

虛二星一十度距南星去極一百三度在赤道外一十二度

危宿

危三星一十七度距南星去極九十八度在赤道外七度

螢室

營室二星一十六度距南星去極八十五度在赤道內六度

東壁

東壁二星九度距南星去極八十五度在赤道內六度

西方七宿八十一度

奎宿

奎一十六星一十六度距西南大星去極七十六度
在赤道內一十五度

婁宿

婁三星一十二度距中央大星去極八十度在赤道
內一十一度東星入婁宿二度去極七十八度在
赤道內一十三度

胃宿

胃三星一十四度距西南去極六十九度在赤道內

二十二度

昴宿

昴七星一十一度距西南星去極七十一度在赤道
內二十度

畢宿

畢八星一十七度距畢口北星去極七十七度在赤
道內一十四度

觜觿

觜觿三星一度距西南星去極八十四度在赤道內
七度

參宿

參十星一十度距中行西星去極九十四度在赤道外三度中星名參伐星右參入畢一十三度去極九十九度半在赤道外八度半

南方七宿共一百一十一度

東井

東井八星三十三度距西北星去極六十九度在赤道內二十二度

輿鬼

輿鬼四星三度距西南星去極六十八度在赤道內

二十三度

柳宿

柳八星一十五度距西頭第三星去極八十三度在赤道內八度

七星

七星七星七度距大星去極九十七度在赤道外六度
張宿

張六星一十八度距西第二星去極一百三度在赤道外一十二度

翼宿

翼二十二星一十八度距中行第二星去極一百四
度在赤道外十三度

軫宿

軫四星左右轄二星一十七度距西北星去極一百
一度在赤道外十度

石申中官星五十四座共三百一十八星赤
石申中官星統目

招搖一星

梗河三星

大角一星

攝提六星

七公七星

貫索九星

天市垣二十二星

天紀九星

帝一星

宦者四星

候一星

斗五星

宗正二星

宗星二星

宗人二星

河鼓三星

右旗九星

女牀三星

天棓五星

織女三星

天津九星

瓠瓜五星

離宮六星

騰蛇二十二星

天大將軍十一星

王良五星

附路一星

閣道六星

大陵八星

天船九星

天囷鑄一十三星

卷舌六星

天廩四星

附耳一星

五車三柱共一十四星

參旗九星

天關一星

鉞一星

五諸侯五星

北河三星

積水一星

積薪一星

水位四星

南河三星

積尸一星

軒轅十七星

三台六星

少微四星

大微垣一十星

五帝座五星

內屏四星

常陳七星

卽位一十五星

卽將一星

招搖星

招搖一星入氐二度半去極四十五度在赤道內四十六度

梗河星

梗河三星在大角北其西北星入亢八度去極五十七度在赤道內三十四度

攝提星

攝提六星東西各三星西攝提北大星入角七度去極六十九度在赤道內二十二度東攝提南大星入角八度去極七十四度在赤道內一十七度

七公星

七公七星在貫索西北其西頭星入氐三度半去極四十九度在赤道內四十二度

貫索星

貫索九星在天市垣北其門右星入房三度去極五十五度在赤道三十六度

天市垣星

天市垣星二十二星東西各一十一星在房心其南
門右星入尾四度去極九十九度半在赤道外八
度半北門右星入尾三度去極六十四度在赤道
內二十七度西角入氐一十三度去極六十九度
在赤道內二十二度北門左星入尾一十七度去
極六十九度在赤道內二十八度南門左星入尾
一十二度去極一百五度在赤道外一十四度

天紀星

天紀九星在天市垣北其西星入尾一度去極五十

五度在赤道內三十六度

帝星

帝一星在天市垣正中入尾一十一度去極七十五度在赤道內一十六度

宦者星

宦者四星在帝星西其南星入尾九度去極七十七度在赤道內一十四度

候星

候一星在帝星東南入尾一十六度去極八十六度在赤道內五度

宗星

宗星二星在宗人星北入箕七度去極七十九度在赤道內十二度

宗人星

宗人四星在宗星南其東星入箕四度去極八十八度在赤道內三度

宗正星

宗正二星在宗人星西其北星入尾十六度去極八十六度在赤道內五度

河鼓星

河鼓三星在牽牛星西北其大星入斗二十度去極八十五度在赤道內六度

右旗星

右旗九星在河鼓星西南其北星入斗十七度半去極八十六度半在赤道內四度半

女牀星

女牀三星在天紀北其西星入箕一度去極五十二度在赤道內三十九度

天棓星

天棓五星在紫微垣其南星入箕六度去極四十

四度在赤道内四十七度

織女星

織女三星在天市垣東北其大星入斗十二度去極五十二度在赤道内三十九度

天津星

天津九星在河中其西北星入斗二十三度去極四十八度在赤道内四十三度

瓢瓜星

瓢瓜五星在牽牛北其西北觜星入牛七度去極八十度在赤道内十一度大星去極八十三度西

星入女二度

離宮星

離宮六星兩、相連夾附營室上星

騰蛇星

騰蛇二十二星在室北河中尾三星出河南其星身西北明星入危八度去極四十六度在赤道內四十五度

天大將軍星

天大將軍十一星在婁北其北頭大星入婁三度去極六十一度在赤道內三十度

王良星

王良五星在壁北河中其西觜星入壁六度去極三十九度半在赤道內五十一度半

附路星

附路一星在王良星東入奎八度去極三十八度在赤道內五十三度

閣道星

閣道六星其二星在紫微垣其四星在王良東其南第一星入奎十三度去極四十七度南第四星入婁三度去極三十六度半在赤道內五十四度半

大陵星

大陵八星在胃北其北尾星入婁十一度去極四十二度在赤道內五十一度其南頭北星入婁十一度在赤道內三十三度

天船星

天船九星在大陵北其尾星入胃一度去極四十二度東鉤頭星入昴十度去極四十一度在赤道內五十度第二星入畢一度去極四十三度第三星入畢初度去極四十五度

天囷星

天囷一十三星如一字形在胃南臨赤道其北頭星入胃五度去極八十六度在赤道內五度東星入胃九度去極九十一度當赤道尾星在赤道外

卷舌星

卷舌六星其昴北其尾星入胃十二度去極五十三度在赤道內三十八度南頭第一星入胃十四度去極六十一度在赤道內三十度

天廩星

天廩四星在胃南其南星入胃一十一度去極八十六度在赤道內五度

附耳星

附耳一星附畢口南星入畢三度去極八十一度在赤道內十度

五車星三柱星

五車三柱共一十四星在畢北其五車西南入畢六度去極六十一度在赤道內三十度東星入參二度北星入觜一度東南星入畢一十六度半

參旗星

參旗九星在畢參間北入畢星十度半去極七十八度半在赤道內一十二度半南星在赤道外二度

半

天關星

天關一星在觜參北入觜半度去極七十一度在赤道二十度

鉞星

鉞一星附井南行西星入參九度去極六十九度在赤道內二十二度

五諸侯星

五諸侯五星在井東北其西星入井六度去極五十六度半在赤道內三十四度半

北河星

北河三星在五諸侯北其西星入井一十七度去極五十七度半

積水星

積水一星在北河北入井一十八度半去極五十四度半在赤道內三十六度半

積薪星

積薪一星在北河東北入井二十六度去極六十二度在赤道內二十九度

水位星

水位四星在井脚東其西星入井一十九度去極七十四度在赤道內一十一度

南河星

南河三星在井東南其西明星入井一十九度去極八十度在赤道內一十一度

積尸星

積尸一星在鬼中索孛然入鬼一度半去極六十九度在赤道內二十二度

軒轅星

軒轅一十七星在張北其大星入張二度去極七十

三度半在赤道內一十七度半其右一星曰太民
入張二度半去極七十四度半在赤道內一十六
度半其左一星曰少民入張八度去極七十五度
在赤道內一十六度

三台星

三台六星上台二星在柳北其北星入柳六度去極
四十度在赤道內五十一度中台二星其北星入
張二度去極四十四度在赤道內四十七度下台
二星在太微垣西蕃北其北星入翼二度去極五
十四度在赤道內三十七度

少微星

少微四星在太微垣蕃西北斜列其東南星入張一十七度半去極六十六度在赤道內二十五度

太微垣星

太微垣一十星東西各五星在翼軫北其西蕃北星爲上相入翼一度去極六十六度在赤道內二十五度南門右星爲右執法入翼一十一度南去極八十四度在赤道內七度南門左星爲左執法入軫初度去極八十六度在赤道內五度東蕃北星爲上將第二星爲次將第三星爲次相第四星爲

上相西蕃北星爲上相第二星爲次相第三星爲
次將第四星爲上將

五帝座星

五帝座五星在太微垣中央 黃帝座入翼一十一
度半去極七十一度在赤道內二十四度帝四方
各去黃帝座二度

內屏星

內屏四星在帝座南其西北星入翼九度半去極七
十七度在赤道內一十三度半

常陳星

常陳七星在帝座北其西星入翼九度去極五十二度在赤道內三十九度

卽位星

卽位一十五星在帝座東北頭大星入軫四度去極五十八度在赤道內三十三度

卽將星

卽將一星在太微垣東北入軫一十二度去極四十七度在赤道內四十四度

石申外官星三十八座共二百七十一星亦
石申外官星統目

平星二星

庫樓二十九星

南門一星

騎官二十七星

西咸四星

鈎鈴二星

東咸四星

積卒十二星

神宮一星

傳說一星

魚一星

天江四星

建六星

龜五星

杵三星

鰲十四星

天弁九星

離珠五星

九坎九星

墳墓四星

敗臼四星

壁壘陣十二星

羽林四十五星

北落師門一星

天倉六星

土司空一星

天苑十六星

玉井四星

屏二星

廁四星

矢一星

軍市十三星

狼一星

野鷄一星

孤矢九星

老人一星

天稷五星

長沙一星

平星

平星二星在角南庫樓北其西星入軫一十六度去極一百一十度在赤道外一十九度

庫樓星

庫樓共二十九星在角南其庫樓西北星入軫一十七度去極一百二十三度在赤道外三十二度衡四星其西北星入角三度去極一百二十八度在赤道外三十七度五柱一十五星三三相連散在庫樓中

南門星

南門二星在庫樓南其西星入軫一十度去極一百

四十三度半在赤道外五十二度半

騎官星

騎官二十七星在亢南其西行北星入亢六度去極一百二十三度半在赤道三十二度半

西咸星

西咸四星在房西北其北星入房五度去極九十八度半在赤道外七度半南星入氐一十三度去極一百七度在赤道外一十六度

鈎鈴星

鈎鈴二星其西星入房三度去極一百六度在赤道

外十五度

東咸星

東咸四星在心北其南星入心二度去極一百一十二度半在赤道外二十一度半

積卒星

積卒一十二星在房心星南其北星入房三度半去極一百二十六度在赤道外三十五度

神宮星

神宮一星入尾一度去極一百二十八度在赤道外三十七度

傳說星

傳說一星在尾東入尾一十四度去極一百二十九度在赤道外三十八尾度

魚星

魚一星在箕西入尾一十六度去極一百二十七度在赤道外三十六度

天江星

天江四星在尾北其西第一星入尾七度去極一百一十四度在赤道外二十三度

建星

建星六星在斗南魁東北其西第一星入斗六度去極一百一十三度半在赤道外二十二度半

龜星

龜五星在尾南其西北頭星入尾一十二度半去極一百三十五度在赤道外四十四度

杵星

杵三星在箕南其北星入箕二度半去極一百三十七度半在赤道外四十六度

鰲星

鰲十四星在南斗南其北頭星入斗二度去極一百

三十一度在赤道外四十度

天弁星

天弁九星在建星北其中央星入斗四度去極九十六度半在赤道外五度半

離珠星

離珠五星在牛女北其東星入女一度去極九十六度半在赤道外五度半

九坎星

九坎九星在牛南其西南星入斗二十四度去極一百三十七度在赤道外四十六度

墳墓星

墳墓四星在危東北其中星入危六度去極九十八度在赤道外七度

敗臼星

敗臼四星兩相對其西頭北星入危五度去極一百三十六度在赤道外四十五度東頭北星入室二度去極與西北星同

壘壁陣星

壘壁陣一十二星其西頭觜星入虛七度去極一百一十一度在赤道外二十度東頭觜星入壁初度

去極一百二度在赤道外一十一度

羽林星

羽林四十五星在室壁下壘壁陣南東西列北第一
行西星入危一十三度去極一百七度在赤道外
一十六度東北星入壁初度去極一百四度在赤
道外一十三度

北落師門星

北落師門一星在羽林星西入危一十二度去極一
百二十九度半在赤道外三十八度半

天倉星

天倉六星在奎南其西北星入奎八度去極一百二度在赤道外一十一度

土司空星

土司空一星在天倉南入奎二度去極一百一十六度半在赤道外二十五度半

天苑星

天苑十六星在胃昴南其西中星入胃三度去極一百一十三度在赤道外二十二度東至昴十一度

玉井星

玉井四星在參右腳其西北星入畢一十二度半去

極九十九度半在赤道外八度半

屏星

屏星二星在參右腳南其北星入畢一十五度去極一百一十三度在赤道外二十二度

廁星

廁四星在參南其西北星入參三度半去極一百一十三度在赤道外二十二度

矢星

矢一星在廁南入參六度去極一百二十四度在赤道外三十三度

軍市星

軍市一十三星在參東南其西中星入井一度去極
一百八度在赤道外一十七度東星入井八度去
極一百八度在赤道外一十七度

狼星

狼一星在軍士東入井一十度去極一百七度在赤
道外一十六度

野雞星

野雞一星在軍市中入井四度去極一百八度在赤
道外一十七度

孤矢星

孤矢九星矢射狼其西南梢星入井十四度去極一百二十四度在赤道外三十三度東北梢星入井二十七度去極一百一十三度在赤道外二十二度

老人星

老人一星在孤矢南入井九度去極一百四十三度半在赤道外五十二度半

天稷星

天稷五星在星南其西星入柳一十三度半去極

一百三十七度在赤道外四十六度

長沙星

長沙一星在軫中入軫二度去極一百五度在赤道外一十四度